



Allah

Hatib: dr. Bender ibn Abdulaziz Belile

6. rebiul-ahir 1443. po Hidžri / 12. novembar 2021.

Sva hvala i zahvala pripadaju Allahu, Onome Koji se pokazao, Svojim štićenicima, svojstvima Svoje uzvišenosti, i Koji je osvijetlio njihova srca prizorima Njegovog savršenstva, i dao im priliku da Ga spoznaju kroz Njegove blagodati i dobrotu. Svjedočim da nema boga osim Allaha, jedinog, Koji ravnog nema u Biću, svojstvima i djelima, i svjedočim da je Muhammed, sallallahu alejhi ve sellem, Njegov rob i poslanik, čijim je poslanstvom Allah uvećao Svoje blagodati prema stvorenjima, neka su na njega Allahova milost, spas i blagoslov, na njegove ashabe i bliski rod i porodicu, i sve one koji slijede njegov put i obrazac. Oporučujem sebi i vama, o ljudi, bogobožnost. Nema veće plemenitosti od bogobjaznosti, niti veće počasti od islama, niti većeg zagovarača od pokajanja, niti ljepše odjeće od zdravlja. Blago se onome ko bude učio i opskrbio se potrebnim znanjem, i onome ko bude radio dobra djela i trudio se, i onome ko se pribojava obračuna pa se pripremi za njega. "A dobro koje za sebe unaprijed osigurate naći ćete kod Allaha još većim i dobit ćete još veću nagradu." (El-Muzzemmil, 20)

O vjernici, vrijednost znanja mjeri se vrijednošću onoga čemu nas ono uči, a najvrednije i najčasnije znanje jeste ono o Allahu Uzvišenom: Istinskom Bogu, dostojnom obožavanja i klanjanja, Gospodaru, dostojnom svake zahvalnosti, Vladaru i Vlasniku, dostojnom svake uzvišenosti i svetosti, Uzvišenom i Onome Kome pripadaju sve počasti, Živom, Samoopostojećem, Koji sve održava, dostojnom predanosti i potčinjenosti svih Njegovih stvorenja. On je Prvi bez početka, i Zadnji bez kraja, Uzvišeni koji nema sličnog i Sebi ravnog, i Koji je nedostižan ljudskim mislima, mašti i pretpostavkama, i niko Mu, od Njegovih stvorenja, nije sličan.





Uzvišeni kaže: "... a od onoga što On zna – drugi znaju samo onoliko koliko On želi." (El-Bekara, 255)

"... a oni znanjem ne mogu Njega obuhvatiti." (Taha, 110)

U hadisu se kaže: "Slavljen neka si, ja Te ne mogu, onako kako Ti dolikuje, pohvaliti, Tebi pripada onoliko hvale koliko si sam Sebe pohvalio." (Muslim)

Allah je dostojan svojstava savršenstva i uzvišenosti, i Njegova stvorenja obožavaju Ga s punim poštovanjem, skrušenošću, strahom i poniznošću. "... i reci: 'Hvaljen Allah, Koji Sebi nije uzeo djeteta i Koji u vlasti nema ortaka, i Kome ne treba zaštitnik zbog nemoći – i hvaleći Ga veličaj!'" (El-Isra, 111)

Njega, zbog Njegove uzvišenosti, slavi cijeli kosmos, a Njegovoj vlasti potčinjeno je sve što postoji.

Uzvišeni kaže: "... i ne postoji ništa što Ga ne veliča, hvaleći Ga." (El-Isra, 44) "Allaha hvali sve što je na nebesima i na Zemlji, i On je Silni i Mudri." (El-Hadid, 1) Samo Njemu se klanjamo i pred Njim ničice padamo i samo Njega obožavamo. "Reci: 'Klanjanje moje, i obredi moji, i život moj, i smrt moja doista su posvećeni Allahu, Gospodaru svjetova, koji nema saučesnika; to mi je naređeno i ja sam prvi musliman.'" (El-En'am, 162–163) Njemu teže srca, s Njim se smiruju duše, u Njegovoj spoznaji je užitek za razum i Njega trebaju sva Njegova stvorenja. A kako i ne bi kada je On njihov Stvoritelj i Tvorac, Koji ih je stvorio ni iz čega i svemu dao oblik, Njemu povjeravaju svoje želje, kod Njega traže utočište u iskušenjima i Njemu pribjegavaju u nevoljama. Nije osjetio slast života onaj koji nema voljenog uz kojeg osjeća sigurnost i smirenost. On čuva ono što je stvorio i ono što je iz nepostajanja izveo, i čuva Svoje štice (evlije, dobre i čestite robove) od upadanja u grijeh i u ono što bi ih upropastilo, ukazuje im Svoju blagost i kada se kreću i kada miruju, obuhvata Svojim znanjem tajno i skriveno, On je Sveznajući, Koji zna šta ljudi kriju u svojim prsima, Jedini u Koga se pouzdaje, od Koga se očekuje i kod koga se traži utočište. "On je Gospodar istoka i zapada, nema boga osim Njega, i Njega uzmi za zaštitnika!" (El-Muzzemmil, 9) On je Džebbar, Onaj Koji pruža utjehu srcima i





tijelima ožalošćenih, siromašnih i nevoljnika, popunjava prazninu u njihovim srcima, briše njihove grijehе i obilno ih nagrađuje. Zato je jedna od Poslanikovih dova bila: “Gospodaru, oprosti mi, smiluj mi se i podari mi utjehu.” (Ahmed, Ebu Davud i Tirmizi) On svime upravlja, stvara, opskrbljuje, naređuje i zabranjuje, usmrćuje i oživljava, donosi presudu i izvršava je, čini da noć i dan naizmjenice nastupaju. “Njemu se mole oni koji su na nebesima i na Zemlji; svakog časa On se zanima nečim.” (Er-Rahman, 29) On svemu zna broj i sve stvari je obuhvatio Svojom milošću, mudročću i blagoščću. O ljudi, Allah uslišava molbu onoga koji Ga moli, dovoljan je onome koji nema, daje blagodati i prije zasluge, velikodušno ukazuje dobročinstvo ne tražeći ništa zauzvrat. Njemu nije skrivena nijedna dova, kod Njega neće propasti nijedna molba i ničiji trud kod Njega neće biti uzaludan. On je blizu pored Svoje uzvišenosti, uzvišen pored Svoje blizine, kada Ga zoveš, on čuje tvoj poziv, a kada šapućeš, On čuje tvoj šapat: zato Mu povjeravaš svoje potrebe, prepuštaš svoju dušu, žališ Mu se na brige, moliš Ga da od tebe otkloni nevolju, tražiš pomoć od Njega u svojim poslovima, moliš Ga da te opskrbi iz riznica Svoje milosti i dā ti ono što ti niko drugi ne može dati, produži ti životni vijek, daje ti zdravlje u tijelu i obilnu opskrbu i otvara ti zatvorena vrata. On ti je povjerio ključeve Svojih riznica, dopustivši ti da tražiš od Njega sve što poželiš, i kada god budeš htio možeš “pokucati” na vrata Njegovih blagodati. Ne padaj u očaj zbog odgađanja uslišenja tvojih molbi, jer je poklon u skladu sa nijetom, namjerom, a možda je uslišenje odgođeno kako bi onaj koji moli i nada se dobio još veću i potpuniju nagradu. On ti je otvorio vrata pokajanja i ukazao ti na put povratka Njemu. Nije postavio između Sebe i tebe bilo kakve barijere, ne traži od tebe da se obraćaš bilo kome, mimo Njega, ko će se zauzeti kod Njega za tebe, nije ti zabranio da se pokaješ nakon što učiniš grijeh, ne požuruje s kaznom, ne prigovara ti i ne sramoti te zbog grijehа, tvoje odustajanje od grijehа učinio je dobrim djelom, tvoj grijeh broji kao jedan, a tvoje dobro djelo broji kao deset dobrih djela. Slavljen neka si, Allahu! Slavljen neka si, Vladaru, koliko si samo moćan i silan! Slavljen neka si, kolika je samo Tvoja uzvišenost! Ti si Uzvišeni, Ponosni i Hvaljeni! Ti si, o Allahu, dostojan poniznosti, uz Tebe je ponos, Tebi se usmjeravaju težnje, od Tebe je strah, vjerovanje je u Tvoju





jednoću ubjeđenje, na Tebe je oslonac, Tvoj oprost je nada, a Tvoje zadovoljstvo je cilj. "Samo Tebe obožavamo i samo od Tebe pomoć tražimo." (El-Fatiha, 5)

Bojte se Allaha i znajte da je spoznaja Allaha svjetlost koja obasjava put onome koji ide k Allahu, i uputa za zbunjenog. Ibn Tejmijja, Allah mu se smilovao, rekao je: "Istinska slast, radost, lijepi trenuci i uživanje, koji se ne mogu opisati, su u spoznaji Allaha, Njegovom obožavanju i vjerovanju u Njega." Kada čovjek zna da njegovom Gospodaru pripadaju svojstva savršenstva i uzvišenosti, i da postoje jasni dokazi koji ukazuju na Njegovu veličinu i ljepotu, dobrotu i blagodarnost, on Ga zavoli više od sebe, svoje porodice i djece, a to je najveći stepen i najviša deredža. Uzvišeni kaže: "... ali pravi vjernici još više vole Allaha." (El-Bekara, 165) Poslanik, sallallahu alejhi ve sellem, rekao je: "Kod koga se nađu tri stvari, osjetio je slast vjerovanja: da mu Allah i Poslanik budu draži od svih ostalih, da voli onoga koga voli samo radi Allaha i da prezire da se vrati u nevjerstvo kao što prezire da bude bačen u vatru." (Buhari i Muslim) Od nužnih posljedica ljubavi prema Gospodaru jeste pokornost i činjenje ibadeta samo Njemu, Koji nema sudruga, iskrenost prema Njemu, izvršavanje Njegovih naredbi i ostavljanje zabrana, ustrajnost u Njegovom spominjanju, jer ako neko voli nekoga, često ga spominje. U hadisi-kudsiju Uzvišeni kaže: "Ja sam sa Svojim robom kad god Me spomene." (Buhari i Muslim)

Donosite salavate na Poslanika, sallallahu alejhi ve sellem, podarenu milost i nepresušnu blagodat, to vam je naredba od vašeg Gospodara, Koji je objavio: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šalžite mu pozdrav!" (El-Ahzab, 56)

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

